

Na osnovu člana 13. Zakona o reviziji privatizacije državnog kapitala u privrednim društvima i bankama („Službene novine Federacije BiH“, br. 55/12), direktor Agencije za reviziju privatizacije putem Vlade Federacije Bosne i Hercegovine, Parlamentarnoj komisiji Federacije Bosne i Hercegovine i Parlamentu Federacije Bosne i Hercegovine dostavlja,

INFORMACIJU O IZVRŠENIM REVIZIJAMA PRIVATIZACIJE DRŽAVNOG KAPITALA PRIVREDNIH DRUŠTAVA I BANAKA U FEDERACIJI BOSNE I HERCEGOVINE ZA PERIOD JULI–DECEMBAR 2018. GODINE

UVOD

Agencija za reviziju privatizacije u Federaciji Bosne i Hercegovine (u daljem tekstu: Agencija) djeluje kao samostalna institucija u Federaciji Bosne i Hercegovine, čija je djelatnost propisana odredbama člana 7. Zakona o reviziji privatizacije državnog kapitala u privrednim društvima i bankama („Službene novine Federacije BiH“, broj 55/12) u daljem tekstu (Zakon).

Na osnovu člana 13. Zakona, Agencija je dužna svakih šest mjeseci putem Vlade Federacije Bosne i Hercegovine informirati Parlamentarno povjerenstvo Federacije Bosne i Hercegovine, Parlament Federacije Bosne i Hercegovine o izvršenim revizijama privatizacije državnog kapitala privrednih društava i banaka u Federaciji Bosne i Hercegovine.

Agencija ima svojstvo pravnog lica.

Sjedište Agencije je u Sarajevu, Ulica Ustanička 11, Ilidža.

Organizacija, upravljanje i rukovođenje Agencijom uređuje se Uredbom i drugim općim aktima Agencije, u skladu sa Zakonom.

Ostvarenje planiranih zadataka izvršit će se u skladu sa Zakonom, a oni se odnose na zaštitu prava građana utvrđenih Ustavom Federacije Bosne i Hercegovine državne svojine u procesu privatizacije u Federaciji Bosne i Hercegovine i javnog interesa zaštićenih vrednota, ukupnog pravnog poretka, javnog morala te postizanja ciljeva propisanih odredbama člana 4. Zakona o reviziji privatizacije na način da se utvrdi je li u postupku privatizacije došlo do povrede odredbi Zakona o privatizaciji.

STRATEŠKI CILJEVI

Agencija je u okviru svojih zakonskih ovlasti i obaveza djelotvornog i brzog izvršavanja povjerenih joj zadataka, utvrdila tri ključna strateška cilja koja će joj pomoći u realizaciji ostvarenja njezinih ciljeva:

Strateški ciljevi		
Uposliti revizorsko i administrativno osoblje koje ispunjava uslove za obavljanje poslova iz njene nadležnosti, u skladu sa posebnim uslovima utvrđenim Pravilnikom o unutrašnjoj organizaciji radnih mjesta Agencije.	Izvršiti profesionalno i odgovorno proces revizije privatizacije privrednih društava i banaka za navedenu godinu spram finansijskih sredstava i raspoloživosti ljudskih resursa, a u skladu sa Zakonom o reviziji privatizacije državnog kapitala u privrednim društvima i bankama.	U toku revizije privatizacije, a u skladu sa zakonskim obavezama, izvještavati Vladu FBiH, Parlament Federacije BiH i cjelokupnu javnost o procesima revizije u vidu izvještaja (polugodišnjih, godišnjih i završnog izvještaja).

PLAN RADA ZA 2018. GODINU

Odlukom Vlade Federacije Bosne i Hercegovine V. broj: 244/2018 od 21.03.2018. godine, usvojen je Plan rada za 2018. godinu, kojim je planirano 6 (šest) privrednih društava i 5 (pet) banaka, koje treba revidirati, a rađen je u skladu sa trenutno zaposlenim revizorskim osobljem 4 (četiri) revizora, a od decembra mjeseca sa 3 (tri) zbog prestanka sa radom revizora ekonomske struke.

RAD NA REVIZIJI PRIVATIZACIJE

Odgovornost revizora je sačiniti Izvještaj o obavljenoj reviziji pretvorbe i privatizacije privrednog društva i banke na osnovu utvrđenog činjeničnog stanja. Postupci revizije započinju donošenjem Rješenja o otpočinjanju revizije, te slanje svim relevantnim stranama dopisa za prikupljanjem dokumentacije potrebne za proces revizije.

Najveći dio podataka i dokumenata prikuplja se od Federalne Agencije za privatizaciju i kantonalnih agencija za privatizaciju, Agencije za bankarstvo, kod privrednih društava i banaka kod kojih će se obaviti revizija, te od ostalih relevantnih institucija i organa koji su učestvovali u procesima privatizacije. Revizija privatizacije je vršena u skladu sa Zakonom o reviziji privatizacije državnog kapitala u privrednim društvima i bankama ("Službene novine Federacije BiH", broj 55/12), i Zakonom o reviziji institucija u Federaciji Bosne i Hercegovine ("Službene novine Federacije BiH", broj 22/06). Postupak revizije proveden je u skladu sa revizorskim standardima Međunarodne organizacije vrhovnih revizijskih institucija – INTOSAI ("Službene novine Federacije BiH", br. 30/11 i 62/14) i Etičkim kodeksom profesionalne etike revizora.

Djelujući u tom smjeru, sprovodile su se sljedeće aktivnosti:

- odlazak i održavanje sastanaka sa predstavnicima pomenutih Agencija, ministarstvima (premijerima i ministrima);
- saradnja sa Komisijom za vrijednosne papire, Financijskom policijom te kantonalnim tužilaštvima i sudovima;
- održavanje sastanaka sa predstavnicima privatiziranih preduzeća;
- svakodnevno udovoljavanje i održavanje sastanaka sa zainteresiranim licima povodom privatizacije odnosnih preduzeća (načelnici općina, općinska vijeća, sindikati, radnici);
- pružanje informacija medijima, povodom pokrenutih revizija i informisanje o istim.

U tekstu koji slijedi, prikazan je pregled pokrenutih revizija u drugoj polovini 2018. godine:

1. DUBRAVA“ d.d. Cazin

Rješenjem Agencije za reviziju privatizacije u Federaciji Bosne i Hercegovine br. 01-02-1-129/18 od 26.03.2018. godine pokrenut je postupak revizije privatizacije privrednog društva „DUBRAVA“ d.d. Cazin, u skladu sa usvojenim Planom rada agencije za 2018. godinu.

Odlukom o imenovanju revizora imenovana su dva ovlaštena revizora za reviziju privatizacije navedenog privrednog društva. Naknadnom Odlukom direktora, pored imenovanih revizora imenovan je još jedan ovlašten revizor za postupak revizije privatizacije navedenog privrednog društva i sačinjavanje izvještaja o izvršenoj reviziji pretvorbe i privatizacije. Budući da je jednom od imenovanih revizora u toku postupka revizije prestao radni odnos u agenciji, došlo je do objektivnog pomjeranja rokova određenih za izradu revizorskog izvještaja.

Revizori su, u skladu sa odredbama člana 12. Zakona o reviziji privatizacije državnog kapitala u privrednim društvima i bankama, učesnicima postupka privatizacije navedenog privrednog društva uputili zahtjeve za dostavljanje podataka, informacija i dokumentacije iz postupka privatizacije.

Utvrđeno je da se tražena dokumentacija ne nalazi u posjedu Agencije za privatizaciju Unsko-sanskog kantona Bihać, budući da je Kantonalno tužilaštvo Bihać izuzelo dokumentaciju iz agencije za potrebe vođenja istrage. Od pokretanja postupka revizije do dana prekida postupka revizije ovoj agenciji nije od privrednog društva „DUBRAVA“ d.d. Cazin stigao odgovor na zahtjev i urgenciju za dostavljanje dokumentacije, niti su isti dostavili bilo kakvu dokumentaciju iz postupka privatizacije, iako je vlasnik društva u usmenom razgovoru sa direktorom Agencijom, istu obećao dostaviti.

Nakon uvida u raspoloživu dokumentaciju, dostavljenu iz Tužilaštva USK-a, utvrđeno je da za sačinjavanje Izvještaja nedostaju dokazi koji se odnose na obavezu ispunjavanja ugovornih obaveza preuzetih od strane kupca. Nakon traženja dodatne dokumentacije od tužilaštva smo obaviješteni da postoje poteškoće sa prikupljanjem

dokumentacije iz razloga što su prostorije u kojima je sjedište privrednog društva iznajmljene međunarodnim organizacijama koje su u iste smjestile ilegalne imigrante koji borave na teritoriji Unsko-sanskog kantona, te da je dokumentacija izmještena na nepoznatu lokaciju, te ukoliko dodatna relevantna dokumentacija bude pronađena ista će nam biti dostavljena radi provođenja postupka revizije.

Slijedom navedenog, a imajuću u vidu činjenicu da se radi o dokumentaciji koja je neophodna za izradu Izvještaja, usljed nedostatka iste, revizori nisu bili u mogućnosti izraditi revizorski izvještaj, niti dati na zakonu zasnovanu ocjenu postupka privatizacije predmetnog privrednog društva.

Nakon toga donesen je Zaključak br. 01-02-1-129-3/18 od 30.10.2018. godine kojim se privremeno prekida postupak revizije privatizacije privrednog društva „Dubrava“ d.d. Cazin, koji prekid će trajati dok se agenciji ne obezbjedi potrebna dokumentacija potrebna za sačinjavanje izvještaja.

2. „Centrotrans-DC“ d.o.o. Sarajevo

Zaključkom Agencije za reviziju privatizacije u Federaciji Bosne i Hercegovine broj: 01-02-1-283-5/16 od 19.07.2018. godine, a u vezi sa Rješenjem Agencije broj: 01-02-1-283/16 od 07.09.2016. godine, i Zaključkom br. 01-02-1-283-2/16 od 05.12.2016. godine, nastavljen je postupak revizije privatizacije privrednog društva „Centrotrans-DC“ d.o.o. Sarajevo.

Kako je postupak revizije navedenog privrednog društva predhodno bio privremeno prekinut zbog nedostatka neophodne dokumentacije potrebne za sastavljanje nacrtu izvještaja, ovaj postupak je nastavljen nakon što su Ministarstvo saobraćaja Kantona Sarajevo i Agencija za privatizaciju KS obavijestili ovu agenciju da je u ministarstvu pronađena dokumentacija iz postupka privatizacije. Kantonalna agencija za privatizaciju KS izvršila preuzimanje navedene dokumentacije (tri registratora), nakon čega je ovoj agenciji dostavila dio dokumentacije preuzete iz ministarstva.

Revizori su izvršili uvid u dostavljenu dokumentaciju nakon čega su od Kantonalne agencije za privatizaciju KS zatražili dostavljanje kompletne dokumentacije preuzete iz ministarstva, koju je agencija dostavila dopisom od 14.09.2018. godine.

Nakon uvida u kompletnu dokumentaciju revizori su utvrdili da u pregledanoj dokumentaciji nedostaju dokazi koji se odnose na vrijednost i način raspolaganja imovinom iz pasivnog podbilansa navedenog privrednog društva, te da nakon ponovljenih zahtjeva nadležnim institucijama, Agenciji za privatizaciju FBiH, kao i Kantonalnoj agenciji za privatizaciju Sarajevo nisu dobili potrebne informacije i dokumentaciju.

Osim navedenog, revizori nisu mogli utvrditi ispunjavanje ugovornih obaveza iz člana 4. Ugovora o kupoprodaji 94,18% kapitala društva „Centrotrans-DC“ d.o.o. Sarajevo, koje se odnose na zapošljavanje, i direktna investiciona ulaganja.

Dopisom Kantonalne agencije za privatizaciju Sarajevo navedeno je agencija nije u mogućnosti dostaviti tražene zapisnike o kontroli ugovorenih obaveza jer kontrola nije

rađena, te da su u 2016. godini pozvali kupca da pripremi dokumentaciju za izradu Aneksa ugovora, kako bi se precizirao rok do kada je dužan da izvrši ugovorne obaveze, ali da im kupac do dana sastavljanja navedenog dopisa nije dostavio traženu dokumentaciju. Navedeno je i istaknuto u Zaključku o nastavku postupka revizije privatizacije privrednog društva.

Dodatno je potrebno istaći da je dopisom Odjela registra poslovnih subjekata Općinskog suda u Sarajevu br. 065-0-RegZ-18-007627 od 11.09.2018. godine ova agencija obaviještena da se cio spis subjekta upisa pod nazivom „CENTROTRANS-DC“ d.d. Sarajevo nalazi na Kantonalnom sudu Sarajevo, na odlučivanju po žalbi, zbog čega nisu u mogućnosti dostaviti nam tražene podatke iz registra. Vrhovnom sudu Federacije Bosne i Hercegovine još uvijek vodi postupak po Zahtjevu za vanredno preispitivanje presude, po zahtjevu ortačke grupe „Kolinska“ i 37 fizičkih lica.

Navedena dokumentacija je neophodna za izradu Izvještaja, te usljed nedostatka iste, nije moguće izraditi revizorski izvještaj, niti dati na zakonu zasnovanu ocjenu postupka privatizacije predmetnog privrednog društva.

Slijedom navedenog agencija je donijela Zaključak br. 01-02-1-283-8/16 od 02.10.2018. godine, kojim se privremeno prekida postupak revizije privatizacije privrednog društva „CENTROTRANS-DC“ d.o.o. Sarajevo, koji će trajati dok se agenciji ne obezbjedi potrebna dokumentacija potrebna za sačinjavanje izvještaja.

3. „SANITEKS“ d.d. Velika Kladuša

Rješenjem Agencije za reviziju privatizacije u Federaciji Bosne i Hercegovine br. 01-02-1-302/18 od 01.10.2018. godine pokrenut je postupak revizije privatizacije privrednog društva „SANITEKS“ d.d. Velika Kladuša, u skladu sa usvojenim Planom rada agencije za 2018. godine.

Tokom postupka revizije, obavijestili smo privredno društvo, kao i Agenciju za privatizaciju Unsko-sanskog kantona da je pokrenut postupak revizije navedenog privrednog društva. Agencija je u usmenim razgovorima navela da zbog svojih organizaciono-tehničkih mogućnosti nisu u mogućnosti da dostave kompletnu dokumentaciju vezanu za ovaj postupak privatizacije, te zbog obimnosti dokumentacije koja se nalazi u 12 registratora, dostavljaju parcijalnu dokumentaciju.

Osim toga ovlaštenu revizora ekonomske struke, koji je bio imenovan za rad na ovom predmetu prekinuo je radni odnos u decembru 2018. godine, usljed čega je došlo do prolongiranja zadatih rokova za izradu izvještaja.

U toku je rad na nacrtu izvještaja, i sačinjen je preeliminarni izvještaj o reviziji privatizacije navedenog privrednog društva, koji ne sadrži ekonomski dio izvještaja.

Nakon imenovanja novog revizora ekonomske struke može se očekivati kompletiranje izvještaj o reviziji privatizacije privrednog društva „SANITEKS“ d.d. Velika Kladuša.

4. „NIGMA“ d.d. Busovača.

Rješenjem br: 01-02-1-290/18 dana 06.09.2018. godine je pokrenuta revizija privatizacije privrednog društva „NIGMA“ d.d. Busovača.

Privremeno je prekinut postupak u predmetu revizija privatizacije „NIGMA“ d.d. Busovača zaključkom broj: 01-02-1-290-3/18 od 25.12.2018. godine. Prekid postupka će trajati dok nadležni organi ne dostave dokumentaciju koja se odnosi na izvršenje obaveza ugovorenih Ugovorom o kupoprodaji predmeta tendera broj 276/00 od 20.04.2000. godine, a izmjenjenih Aneksom III od 30.05.2018. godine u smislu produženja roka izvršenja obaveza do 31.12.2019. godine.

Ugovor o kupoprodaji predmeta tendera broj 276/00 sklopljen je u Travniku dana 20.04.2000. godine između Agencije za privatizaciju u ŽSB/SBK sa sjedištem u Travniku, ul. Fatmić br.1 (u daljem tekstu: Prodavatelj), sa matičnim brojem 1790188 koju je zastupao Nikola Grubešić, direktor, kao ovlaštena osoba i dva privredna društva KORBITZ Kachelofenfabrik GmbH, Ziegeleistrasse 27, A-9020 Klagenfurt-Austria, ZASTUPANA PO Gerhardu Korbitzu prema ugovoru o učešću i poslovnom udruživanju i HORIZONTE BIH ENTERPRISE DEVELOPMENT COMPANY B.V., Nijeverhedsweg 31 c, NL – 1851 NW Heiloo HOLLAND.

Predmet kupoprodaje je bio paket dionica državnog kapitala društva „NIGMA“ d.d. Busovača koje je upisano u registarskom ulošku br.U/I-123 kod registarskog suda Travnik, matični broj 11090249, a koji je predstavljao 97,46% ukupnog kapitala Društva koji je utvrđen početnim bilansom društva i koji je iznosio 3.873.192,00 KM, čija je prodaja objavljena 24.02.2000. godine u „Dnevnom avazu“ i 25.02.2000. godine u „Slobodnoj Dalmaciji“ po Javnom pozivu za prikupljanje ponuda broj 209 i pod šifrom predmeta broj 060400007. Za predmet kupoprodaje kupac se obavezao platiti kupoprodajnu cijenu koju je ponudio u iznosu od 350.000,00 KM, koja je umanjena za iznos uplaćenog depozita u novcu. Kupoprodajnu cijenu kupac je bio dužan uplatiti u roku od 7 dana od dana potpisivanja ugovora na račun Prodavatelja. Kupac se obvezao na slijedeće uslove: zadržati 68 uposlenika društva „NIGMA“ d.d. Busovača i uposliti novih 12 uposlenika na period od dvije godine počev od dana preuzimanja predmeta kupoprodaje iz Ugovora i investirati u preduzeće (upis nove opreme i tehnologije) iznos od 5.975.000,00 KM u periodu od dvije (2) godine od potpisivanja Ugovora po dinamici koja je utvrđena planom investiranja.

Ugovor o zajedničkom preuzimanju Ugovora o kupoprodaji predmeta tendera broj: 276/00 zaključen je dana 22.10.2010. godine između 26 ortaka u Busovači koji su usaglasili da zajednički preuzmu navedeni Ugovor i da sa kupcem zakluče Ugovor o ustupanju Ugovora o kupoprodaji predmeta tendera broj 276/00 zaključenog dana 20.04.2000. godine zaključenog između Agencije za privatizaciju KSB/SBK, kao prodavatelja i KORBITZ Kachelofenfabrik GmbH, Ziegeleistrasse 27, A-9020 Klagenfurt-Austria i HORIZONTE BIH ENTERPRISE COMPANY B.V., Nijeverhedsweg 31 c, NL – 1851 NW Heiloo- HOLLAND kao zajedničkog kupca.

Na Ugovor o kupoprodaji predmeta tendera broj 276/00 zaključen je dana 22.10.2010. godine zaključena su tri aneksa i to: Prvi Aneks Ugovora o kupoprodaji predmeta tendera

broj 276/00 zaključen je u Travniku dana 21.08.2012. godine, Drugi Aneks II ugovora o kupoprodaji predmeta tendera broj 276/00 zaključen je u Travniku dana 30.12.2013. godine i Treći Aneks III ugovora o kupoprodaji predmeta tendera broj 276/00 zaključen je u Travniku dana 30.05.2018. godine. Prema Anesu III krajni rok za ispunjenje ugovornih obaveza utvrđen je datum 31.12.2019. godine.

U smislu člana 3. Zakona o reviziji privatizacije državnog kapitala u privrednim društvima i bankama („Službene novine Federacije BiH broj: 55/12) pod revizijom smatra se naknadni proces ispitivanja i ocjene ispravnosti procesa privatizacije privrednih društava i banaka u Federaciji Bosne i Hercegovine. Slijedom naprijed navedenog, a imajući u vidu činjenicu produženja roka izvršenja obaveza iz Ugovora o kupoprodaji predmeta tendera broj 276/00 do 31.12.2019. godine, revizori nisu bili u mogućnosti dati ocjenu provođenja postupka pretvorbe i privatizacije privrednog društva „NIGMA“ d.d. Busovača, čiji je pravni sljednik TERMO ZIEGEL nigma d.d. Busovača niti sačiniti konačan izvještaj o istom. Obzirom da se radi o postupku koji nije okončan jer ugovorne obaveze nisu izvršene zbog produženja roka izvršenja do 31.12.2019. godine. Zbog navedenih činjenica Agencija nije mogla okončati postupak koji vodi, te je postupila u skladu sa članom 142. stav 1. ZUP-a. Protiv ovog zaključka dopuštena je žalba u roku od 15 dana od dana dostavljanja zaključka, ali nije bilo podnesenih žalbi.

REVIZIJA BANAKA

1. „Vakufska banka,, d.d. Sarajevo.

Rješenjem o pokretanju postupka revizije privatizacije broj 01-02-1-216/18 od 31.05.2018. godine započet je postupak revizije privatizacije „Vakufska banke,, d.d. Sarajevo.

Privremeno je prekinut postupak revizija privatizacije „Vakufske banke“ d.d. Sarajevo i trajat će dok nadležni organi ne dostave potrebnu relevantnu dokumentaciju Agenciji za reviziju privatizacije u Federaciji BiH kako bi se izradio Izvještaj o reviziji pretvorbe i privatizacije „Vakufske banke“ d.d. Sarajevo i donijelo Rješenje po istom. Agencija za reviziju privatizacije u Federaciji BiH vodila je postupak u predmetu revizije pretvorbe i privatizacije „Vakufske banke“ d.d. Sarajevo. U postupku utvrđeno je da se ne može okončati navedena revizija, zbog nedostatka potrebne dokumentacije koja čini osnovu za izradu revizorskog izvještaja, kako slijedi:

- javni poziv objavljen u dnevnim novinama za prodaju 7,14% odnosno 1.152.700,00 KM nominalne vrijednosti dionica Ministarstva finansija Federacije BiH;
- novčani iznos koji je ostvaren prodajom 7,14% odnosno 500.000,00 KM koliko je iznosila ponuđena cijena dionica Ministarstva finansija Federacije BiH i raspolaganje istim;
- Ugovor o kupovini dionica potpisan između Vlade Federacije BiH odnosno Jedinice za privatizaciju banaka i kupca Mahmal Investment Company Ltd;

Protiv ovog zaključka dopuštena je žalba u roku od 15 dana od dana dostavljanja zaključka. U ovom postupku revizije nije bilo podnesenih žalbi.

2. Gospodarska banka d.d. Mostar

Rješenjem broj 01-02-1-364/18 od 12.12.2018. godine pokrenut je postupak revizije privatizacije Gospodarske banke d.d. Mostar, i isti je u toku.

Revizori su uputili zahtjeve za dostavu dokumentacije Agenciji za bankarstvo Federacije BiH; Finansijsko-informatičkoj agenciji; Gospodarskoj banci d.d. Mostar; Registru vrijednosnih papira Federacije BiH; Komisiji za vrijednosne papire Federacije BiH; Općinskom sudu Mostar; Zemljišnoknjižnom uredu Mostar; Općinskom sudu-parnično odjeljenje Mostar; Urgenciju za postupanje Federalnom ministarstvu finansija; Ministarstvu finansija/financija Federacije BiH u toku 2018. godine, te čekamo dostavu tražene dokumentacije.

FAKTORI USPJEHA RADA I RIZICI

Napominjemo da se Agencija svakodnevno susreće sa poteškoćama u smislu sprovedbe Zakona o reviziji privatizacije. U najvećem dijelu to se ogleda u prikupljanju dokumentacije, jer u takvim slučajevima Agencija nema mehanizam da pokrene procedure kaznenih odredbi, a koje su kao takve navedene u Zakonu. S tim u vezi Agencija može tek da obavijesti nadležno tužilaštvo, što Agencija trenutno i radi. U postupku revizije i primjene Zakona uočene su određene nejasnoće i neusklađenosti Zakona sa drugim općim zakonima u Federaciji Bosne i Hercegovine. Pojedine odredbe zakona su prevaziđene, a neke je opet nemoguće primjeniti, zbog toga je neophodno da se pristupi izmjenama i dopunama zakona.

S obzirom da je broj privrednih društava i banaka koje Agencija treba da revidira, a koje su privatizirane u prošlom periodu, znatno veliki, a isto tako i onih narednih privatizacija koje tek trebaju da se izvrše, za uspješno obavljanje revizija, neophodno je u budućem periodu raditi na povećanju budžeta kako bi se povećao broj revizora, a samim tim bi se povećao i broj revizija i po tom osnovu Agencija mogla u većem obimu mogla uzimati predmete u rad.

ZAKLJUČAK

Uspostavljanje Agencije za reviziju privatizacije i njena Zakonom i aktima Vlade Federacije Bosne i Hercegovine definisana djelatnost ima važnu ulogu u ostvarenju ciljeva ulaska u evropske integracije. Proces revizije privatizacije s aspekta evropskih integracija je veoma važan i bitan, što se pokazalo i kod Upitnika Evropske komisije upućenog Bosni i Hercegovini. Transparentnost procesa provedene privatizacije,

najbolje se može sagledati kroz revidirani proces, što u konačnici traži i zahtjeva i Evropska komisija.

Agencija za reviziju privatizacije je u potpunosti posvećena da izvrši sveobuhvatnu reviziju privatizacije na profesionalan i odgovoran način, na načelima dosljedne primjene Zakona, uputa i odluka Vlade Federacije Bosne i Hercegovine, transparentnosti u radu i otvorenosti za sve institucije i stručnu javnost, ali i primjerenog pravnog okruženja, te adekvatnog provođenja aktivnosti nadležnih institucija kako bi ostvarila uspješan rad i strateške ciljeve.

Broj: 01-05-1-329-3/18

Sarajevo, 06.02.2019. godine

DIREKTOR

Vedad Duraković, dipl.oec.